

valens, in Lombardiam apud Cremonam ad statutum concilium [A] iter inchoavit, et apud Parmam magnam fecit moram [a], filium ejus Henricum cum terribili de Alamannia expectans exercitu; qui apud Tridentum [b] civitatem diu hospitatus est, ubi fames valida fuit, volens in Lombardiam descendere, et in eam cum patre, adjutorio Cremonensium et aliorum quorundam, sua iura manutenere. Illico rectores Lombardiae, mala recolentes praeterita, volentes futura vitare [c] deteriora, una ad imperatorem privilegia, quae apud Constantiam facta fuerant, reformare clamaverunt. Quibus protulit: Cum plenarie imperialem habebitis gratiam, nobis datis obsidibus, reformabo. Quod verbum Lombardi audientes, viam filio penitus apud Veronam et Cumum, Cremonensibus [d] vero super flumen Olii pontem facere volentibus, ad eius filium in Lombardia de prato sancti Danielis sublevandum, denegare curarunt; pontem vero, super Athesis flumen [e] factum, rectores Lombardiae modis omnibus laborarunt destruere. Videns autem imperator quod a filio succursum habere nequiret, principibus Alamanniae, quos secum habebat, et aliis de Tuscia, Romania, atque Marchia revertendi concessit licentiam. Volens autem filius de civitate Tridentina [f] se ducere, totam vulcano [g] superante combussit. Demum dictus Imperator, non laeto recedens animo, per Pontem Tremulum Pisis secessit [h], et deinde apud castrum Sancti Miniati resedit. Sed viso Florentinorum et Lucensium exercitu, super flumen Elsaee, concilio primo facto, nocte secessit, et versus Apuleam visus est equitare. [i]

Eodem anno iuraverunt Faventini se adhaesuros Societati Lombardiae.

CAP. CLXXXII.

Eodem anno, die secundo mensis Aprilis, Faventini ad postulationem Lombardorum renovaverunt iuramenta societatis Lombardiae, secundum tenorem privilegii facti apud Constantiam, tunc dicto imperatore [i] existente Ravennae [j].

[a] fecit moram. Sic corrigo: faciens moram, Codd. — [b] qui apud Tridentum. Sic lego. Supplevi qui, nam aliquid in C. M. deesse ibi videtur. Idem C. M. habere videtur, apud Trentum. — [c] futura vitare. Sic lego; Codd., futura victare. — [d] apud Veronam et Cumum; Cremonensibus etc. Codd. habent: apud Veronam. Cumum Cremonensis vero super flumen Olii pontem facere volentibus. An legendum: apud Veronam et Cumum. Cremonenses vero etc. vel: apud Veronam. Cum Cremonenses vero super flumen Olii pontem facere vellent etc.? — [e] super Athesis flumen. Codd., super Atesis flumen. — [f] de civitate Tridentina, C. V.; de civitate Trentina, C. M.; et cum eo Cl. Mitt. — [g] totam vulcano. Sic lego. Codd., tota vulcano. — [h] Pisas secessit. Sic corrigo. Codd., Pissis secessit. — [i] tunc dicto Imperatore. Sic C. V.; tunc diebus imperatore, C. M. — [j] existente Ravennae, C. V.; existente Ravennam, C. M.

[A] Sive diaetam generalem.